



「灣仔」讀藥認真麻麻，但對教藥則十分有信心。「灣仔」上足藥堂，抄足藥方，細心體會之後，悟出教藥方法。

要教好藥，首先要有大書一本，越大越妙，最好就是連藥仔都有二三十個藥性。有了大書，還要有耐性去抄下，抄在「透明紙」上，上堂放出，照紙直讀，全部內容出自權威，照讀包無撞板之可能。讀一次未夠，再讀一次，有人發問，又再讀一次，反覆耐心教導，點到你唔識。

照以上教法，學生必然受落，第一學生抄都抄唔完，那裏有消化的能力，未消化就未識問，未識問就冇人問，冇人問就即係無問題，冇問題就即係大家都明，你話幾正。咁重未夠，還要識多幾吓板斧，有幾句話一定要隨口而出，先至夠型。

例一：“You don’t have to copy, I just want to give you a general idea.”

例二：“I hope you still remember your physiology, I don’t want to elaborate on this again.”

例三：“You don’t have to remember all of them. I include this just to complete the picture.”

「灣仔」讀藥讀到氣咳，Test過幾次之後，勝負參半，「灣仔」自己亦悟出幾下板斧，欣慰之餘，不敢自秘，供諸後人，師弟一定得益不淺。

其一：“You have to copy all of them” 初時「灣仔」唔多信，但Test時死過之後，唔到你唔信。

其二：“You don’t have to remember any physiology, you just have to remember the notes” 總之讀藥時，可乜都唔識，照讀Notes鋤二三十次去考試，有身份證都過。

其三：“You have to remember all of them. They include that just for examination”，風水佬混你十年八年，你唔信邪，到MB時，選擇題做到你企直，你到時包會恨錯唔聽「灣仔」講。

### 一句講晒「書唔駛讀，Notes要熟」。

搵到考MB，「灣仔」建議如果你信耶穌則不妨多去聖堂，唔信者，則拜多的祖先，希望一博就中。其實「灣仔」呢次考MB，都係博博啲者。考試前話選擇題博錯扣分，過一排，又出通告話保留扣唔扣分之權利，其實又駛乜保留咁多餘，扣唔扣分你話事，邊個同你奪權。臨考前一兩日，流電滿天飛，班代又話原則上唔扣，（實際上就唔知咁解），到考試時，試卷上就寫明會扣，即係“May incur a penalty”，“May”者，則係話扣唔扣隨佢話，「灣仔」條氣唔順，舉手問人，阿Sir咪咪咀咁話“*No Comment*”，「灣仔」當堂企直，博好唔博好呢？老老實實，唔識唔博時，又怕唔扣分會賠本，大棍大棍扑落去，又怕扣到渣都有剩，其實想極都唔明，扣唔扣分都要懸疑一番，唔知佢想考藥定考命水。

「灣仔」拜得神多，未有出事，但到今時今日，藥方已忘了五成，真係講出都差家，辜負了教藥師父循循善誘的教導，更對不住自己善抄的Notes。